



Tabang Gikan Sa Kahitas-an

Tinigum ni Watson Goodman

Dili Ibaligya

Ang “TABANG GIKAN SA KAHITAS-AN” mao ang tinigom nga mga bersikulo sa Bibliya nga gihugpong sumala sa mga ulohan nga gihisgotan. Ako nagtuo nga ang labing maayong komentaryo sa Bibliya mao ang Bibliya mismo.

Ang Pulong sa Dios “nagagikan sa kahitas-an” ug makatabang gayod kini sa mga kasingkasing nga gigutom ug giuhaw sa pagkamatarong. Ang Ginoo magpadayag sa Iyang kaugalingon ngadto sa tawo ug maghatag sa Iyang kalipay ug kalinaw sa magtutuo, sa diha nga ang tawo maghinulsol, magbiya sa iyang sala, mopasulod ni Jesu-Cristo sa iyang kinabuhi, ug magtuo sa tibuok niyang kasingkasing ni Ginoong Jesus ingon nga Manluluwas. Nasinati ko kini niadtong tuig 1937, ug sukad wala ko gayod bugtoa kining katingalahang pakig-ambitay uban sa Ginoo. Busa nagdasig ako kanimo sa pagtugyan ngadto Kaniya ingon nga imong Manluluwas ug Ginoo. Buhata kini **KARON kon wala pa nimo kini mahimo.**

ANG GUGMA SA DIOS

1

Pinadayag 1:5

Ug gikan kang Jesu-Cristo, ang kasaligan nga saksi, ang pangamay sa mga nangamatay, ug ang punoan sa mga hari sa yuta.

Jeremias 31:3

Si Jehova sa kanhi pa nagpakita kanako, nga nagaingon: Oo, gihi-gugma ko ikaw sa usa ka gugma nga walay katapusan: busa uban sa mahigugmaong-kalolot gidani ko ikaw.

Juan 3:16

Kay gihigugma gayud sa Dios ang kalibutan nga tungod niana gihatag niya ang iyang bugtong Anak, aron ang tanan nga mosalig

kaniya dili malaglag, kondili may kinabuhing dayon.

Mga Taga-Roma 5:8

Apan ang Dios nagapadayag sa iyang gugma alang kanato pinaagi niini, nga bisan sa mga makasasala pa kita si Cristo nagpakamatay alang kanato.

Juan 13:1

Ug sa wala pa ang fiesta sa Pasko, si Jesus nahibalo nga nahiabut na ang takna sa iyang pagbiya niining kalibutana ug pagadto sa Amahan. Ug sanglit nahigugma man siya sa mga iya nga ania sa kalibutan, sila iyang gihi-gugma hangtud sa katapusan.

2 ANG PAGKA-DIOS NI HESU-KRISTO

1 Timoteo 3:16

Ug dili malalis nga daku gayud ang tinago sa atong tinoohan: Ang Dios nadayag diha sa lawas, nahimatud-an nga matarung diha sa Espiritu, nakita sa mga manolunda, giwali sa taliwala sa kanasuran, gitoohan dinhi sa kalibutan, gibayaw ngadto sa himaya.

Juan 14:9b, 10

“. . . Ang nakakita kanako nakakita sa Amahan. Naunsa bang miingon man ikaw, ‘Ipakita kanamo ang Amahan’? Wala ka ba diay magtoo nga ako anaa sa Amahan ug nga ang Amahan ania kanako? Ang mga pulong nga a-

kong gisulti kaninyo, wala ko isulti kini sa kinaugalingon kong pagbulot-an; hinonoa ang Amahan nga nagapuyo sa sulod nako, siya mao ang nagahimo sa iyang mga buhat.”

Juan 1:1 ug 14

Sa sinugdan mao na ang Pulong, ug ang Pulong uban sa Dios, ug Dios ang Pulong. . . Ug ang Pulong nahimong tawo ug ipon kanamo mipuyo siya nga puno sa grasya ug sa kamatuoran; ug among nakita ang iyang himaya, ang himaya nga ingon sa pagadawaton sa bugtong Anak gikan sa Amahan.

SI HESUS ANG ANAK SA DIOS

3

Mga Taga-Colosas 2:9

Kay diha kaniya nagapuyo sa pagkalawas ang bug-os kinatibukan sa pagka-Dios.

Isaias 9:6

Kay alang kanato ang usa ka bata natawo, alang kanato ang usa ka anak nga lalake gihatag; ug ang kagamhanan igatungtong sa iyang abaga: ug ang iyang ngalan pagatawgon Kahibulongan, Magtatambag, Dios nga Makagagahum, Amahan nga walay Katapusan, Principe sa Pakigdait.

Lucas 1:35

Ang manolunda mitubag kaniya, "Pagakunsaran ikaw sa Espiritu Santo, ug pagalandungan i-

kaw sa gahum sa Labing Halangdon; tungod niini, ang bata nga matawo paganganlan nga balaan, ang Anak sa Dios."

Mateo 17:5

Ug samtang nagsulti pa siya, tan-awa, usa ka masilaw nga panganud mitabon kanila, ug gikan sa panganud dihay usa ka tingog nga nag-ingon, "Mao kini ang akong Anak nga pinalangga, nga kaniya may kalipay ako; patalinghugi ninyo siya."

1 Juan 4:15

Bisan kinsa nga magasugid nga si Jesus mao ang Anak sa Dios, ang Dios magapabilin kaniya, ug siya magapabilin sa Dios.

4 NAGSULTI SI HESUS KANATO KON KINSA SIYA

Juan 11:25

Si Jesus miingon kaniya, “Ako mao ang pagkabanhaw ug ang kinabuhi. Ang mosalig kanako, bisan siya mamatay, mabuhi siya.”

Juan 8:23

Siya miingon kanila, “Kamo taga-ubos, ako taga-itaas. Kamo tagadinhi niining kalibutana, ako dili tagadinhi niining kalibutana.”

Juan 8:58

Si Jesus miingon kanila, “Sa pagkatinuod, sa pagkatinuod, magaingon ako kaninyo, nga sa wala pa si Abraham, mao na ako.”

Juan 10:7

Busa si Jesus miusab pag-ingon kanila, “Sa pagkatinuod, sa pag-

katinuod, magaingon ako kaninyo, nga ako mao ang pultahan alang sa mga karnero.”

Juan 9:5

“Samtang ania ako sa kalibutan, ako mao ang kahayag alang sa kalibutan.”

Juan 6:35

Ug si Jesus mitubag kanila, “Ako mao ang tinapay nga naga-hatag ug kinabuhi; siya nga moari kanako dili gutomon, ug siya nga mosalig kanako dili gayud uha-won.”

Juan 13:13

“Nagatawag kamo kanako nga Magtutudlo ug Ginoo; ug husto kamo kay mao man kana ako.”

MGA MILAGRO NGA GIHIMO NI HESUS

5

Lucas 5:5, 6

Ug si Simon mitubag kaniya, “Ginoo, tibuok gabii namong hago ug wala gayud kamiy nakuha! Apan tungod sa imong sulti akong itaktak ang mga pukot.” Ug sa nabuhat na nila kini, ilang nakuha ang mabagang duot sa isda; ug kay nagkabusbos na man ang ilang mga pukot.

Mateo 20:30 ug 34

Ug tan-awa, dihay duha ka mga buta nga nanaglingkod sa daplin sa dalan, nga sa pagkadungog nila nga si Jesus lumalabay didto, misinggit nga nanag-ingon, “Ginoo, Anak ni David, kaluy-i ka-

mi!”. . . Ug si Jesus naluoy ug iyang gihikap ang ilang mga mata, ug dihadiha makakita na sila ug mikuyog kaniya.

Mateo 14:19-21

Ug ang mga panon sa katawhan iyang gisugo sa pagpanglingkod sa mga balili. Ug sa nagkupot siya sa lima ka tinapay ug duha ka isda, miyahat siya sa langit ug nagpasalamat, ug unya iyang gipikaspikas ang mga tinapay ug gihatag niya kini ngadto sa mga tinunan, ug ang mga tinun-an maoy nanghatag niini ngadto sa mga panon sa katawhan. Ug nangaon silang tanan ug nangabusog. Ug ilang ghipos ang nahibilin

nga mga tipik nga napulogduha ka bukag. Ug ang nangaon may

mga lima ka libo ka mga lalaki, gawas sa mga babaye ug mga bata.

6 SI HESU-KRISTO MAGMUMUGNA UG GINOO

Mga Taga-Colosas 1:16

Kay pinaagi kaniya gibuhat ang tanang mga butang, diha sa langit ug dinhi sa yuta, makita ug dili makita, mga lingkoranan nga hari-anon o kagahum o pamunoan o pagbolut-an — ang tanang mga butang gibuhat pinaagi kaniya ug alang kaniya.

Juan 1:3

Ang tanang mga butang nanga-himo pinaagi kaniya; ug niadtong mga nangahimo na, walay bisan

usa nga nahimo nga dili pinaagi kaniya.

1 Mga Taga-Corinto 1:9

Ang Dios kasaligan ug pinaagi kaniya kamo gipanagtawag ngadto sa pakig-ambitay kauban sa iyang Anak nga si Jesu-Cristo nga atong Ginoo.

Mga Taga-Roma 14:9

Kay alang niining maong tuyo si Cristo namatay ug nabuhi pag-usab aron mahimo siyang Ginoo sa mga patay ug sa mga buhi.

SI HESU-KRISTO MAOY MAGHUHUKOM SA TANAN 7

2 Timoteo 4:1

Sa atubangan sa Dios ug ni Cristo Jesus nga mao ang magahukom sa mga buhi ug sa mga patay, ug pinaagi sa iyang pagpadayag ug sa iyang gingharian, ako magatugon kanimo niini.

Mga Taga-Roma 14:10

Nan, nganong magahukom ka man sa imong igsoon? O ikaw, nganong magatamay ka man sa imong igsoon? Kay kitang tanan moatubang ra unya sa hukmanan sa Dios.

Mga Buhat 10:42

“Ug siya misugo kanamo sa pagwali ngadto sa katawhan, ug

sa pagpanghimatuod nga siya mao ang gitudlo sa Dios aron sa paghukom sa mga buhi ug sa mga patay.”

Mga Taga-Roma 2:16

Unya sa maong adlaw nga, sumala sa akong Maayong Balita, pagahukman na sa Dios ang mga tinagoan sa mga tawo pinaagi kang Cristo Jesus.

Mateo 25:32

“Ug sa iyang atubangan pagatapokon ang tanang kanasuran, ug iyang pagalainon ang usa gikan sa usa, maingon sa magbalantay sa mga hayop nga magalain sa mga karnero gikan sa mga kanding.”

8 KALUWASAN PINAAGI LAMANG KANG KRISTO

Juan 8:24

“Busa giingnan ko kamo nga mangamatay kamo diha sa inyong mga sala, kay mangamatay man gayud kamo diha sa inyong mga sala gawas kon motoo kamo nga ako mao siya.”

Juan 10:9

“Ako mao ang pultahan; kon adunay mosulod agi kanako, siya maluwas; ug siya mosulod ug mogula ug makakaplag siyag masib-sib.”

1 Mga Taga-Tesalonica 5:9

Kay kita wala itagana sa Dios alang sa kapungot, hinonoa aron sa pagkab-ot sa kaluwasan pinaagi sa atong Ginoong Jesu-Cristo.

Mga Hebreohanon 5:9

Ug sa nahimo siyang hingpit, siya nahimong tuboran sa dayong kaluwasan alang sa tanang mag-asugot kaniya.

Juan 14:6

Si Jesus mitubag kaniya, “Ako mao ang dalan, ug ang kamatuoran, ug ang kinabuhi; walay bisan kinsa nga makaadto sa Amahan, gawas kon pinaagi kanako.”

Mga Buhat 4:12

“Ug walay kaluwasan pinaagi kang bisan kinsa pa nga lain; kay walay bisan unsa pang lain nga ngalan sa silong sa langit, nga gikahatag ngadto sa mga tawo, nga pinaagi niini maluwas kita.”

KALUWASAN PINAAGI LAMANG KANG KRISTO 9

Pinadayag 5:9

Ug nanag-awit sila sa usa ka bag-ong awit nga naga-ingon, “Takus ikaw sa pagkuha sa basahong linukot ug sa pag-abli sa iyang mga timri, kay ikaw mao man ang gipatay ug pinaagi sa imong dugo gilukat mo ang mga tawo alang sa Dios, gikan sa tanang kabanaan ug pinulongan ug katawhan ug kanasuran.”

1 Mga Taga-Corinto 1:30

Kay gumikan kaniya kamo ana kang Cristo Jesus nga iyang gihimo nga atong kaalam, atong pagkamatarung ug pagkabinalaan ug pagkatinubos.

Mga Taga-Colosas 1:12-14

Nga magahatag kamo sa mga pagpasalamat ngadto sa Amahan nga mao ang naghimo kanatong takus sa pagambit sa panulondon sa mga balaan diha sa kahayag. Siya mao ang nagluwas kanato gikan sa kagahum sa kangitngit ug naglalin kanato ngadto sa gingharian sa iyang Anak nga pinalangga, kang kinsa kita nakabaton sa pagkatinubos, sa kapasayloan sa mga sala.

Mga Taga-Roma 3:24

Sila pagamatarungon pinaagi sa iyang grasya ingon nga gasa, pinasikad sa pagkatinubos tungod kang Cristo Jesus.

10 PAGTUBOS PINAAGI SA DUGO NI KRISTO

Mga Taga-Efeso 1:7

Diha kaniya kita may katubsaan pinaagi sa iyang dugo, may kapasayloan alang sa atong mga paglapas, sumala sa kadagaya sa grasya sa Dios.

1 Juan 1:7

Apan kon kita magalakaw diha sa kahayag, maingon nga siya anaa sa kahayag, nan, kita may pakig-ambitay ang usa sa usa, ug ang dugo ni Jesus nga iyang Anak nagahinlo kanato gikan sa tanang sala.

Mga Hebreohanon 9:14

Unsa ka labaw pa gayud niini ang mahimo sa dugo ni Cristo,

nga pinaagi sa Espiritu nga dayon mihalad sa iyang kaugalingon nga walay buling ngadto sa Dios, sa paghinlo sa inyong kaisipan gikan sa mga patayng binuhatan aron magaalagad kamo sa Dios nga buhi?

1 Pedro 1:18, 19

Kamo sayud nga gikan sa walay hinungdan nga paggawi nga inyong napanunod gikan sa inyong mga ginikanan kamo gitubos, dili pinaagi sa mga butang madugta ingon sa salapi o bula-wan, kondili sa bililhong dugo ni Cristo, nga daw sa nating karniro nga walay buling o hugaw.

KALUWASAN PINAAGI SA PAGTUO KANG KRISTO 11

Mga Taga-Efeso 2:8, 9

Kay tungod sa grasya kamo nangaluwas pinaagi sa pagtoo; ug kini dili sa inyong kaugalingong kahimoan, kini hatag sa Dios — dili tungod sa mga binubatan aron walay bisan kinsa nga magapasigarbo.

1 Juan 5:4

Kay bisan unsa nga igaanak gikan sa Dios modaug sa kalibutan; ug ang pagdaug nga nagadaug sa kalibutan mao kini: ang atong pagtoo.

Mga Taga-Roma 5:1

Busa, sanglit namatarung man kita pinaagi sa pagtoo, kita may

pakigdinaity na sa Dios pinaagi sa atong Ginoog Jesu-Cristo.

Juan 6:28, 29

Ug sila miingon kaniya, “Unsa may kinahanglan among buhaton aron sa pagbuhat sa ipabuhat sa Dios?” Si Jesus mitubag kanila, “Ang ipabuhat sa Dios mao kini, nga kinahanglan mosalig kamo kaniya nga iyang gipadala.”

Juan 20:31

Apan kining ania gisulat aron motoo kamo nga si Jesus mao ang Cristo, ang Anak sa Dios, ug nga sa pagtoo makabaton kamog kinabuhi diha sa iyang ngalan.

Salmo 103:11

Kay ingon nga ang mga langit hataas ibabaw sa yuta, Ingon man kadaku ang iyang mahigugmaong-kalolot ngadto kanila nga may kahadlok kaniya.

Salmo 103:17

Apan ang mahigugmaong-kalolot ni Jehova nagagikan sa walay katapusan ngadto sa walay katapusan ibabaw kanila nga may kahadlok kaniya, Ug ang iyang pagkamatarung ngadto sa mga anak sa mga anak.

Tito 3:5

Kita iyang giluwat, dili tungod sa mga binuhatan nga nahimo na-

to sa atong pagkamatarung, kondili tungod sa iyang kalooy, pinaagi sa paghugas sa pagkatawo pagusab, ug sa pagkabag-o diha sa Espiritu Santo.

Lamentaciones 3:22, 23

Tungod sa mga mahigugmaong-kalolot ni Jehova kita wala mangalaglag, kay ang iyang mga kalooy walay paghubas. Sila ginabag-o sa matag-buntag; daku ang imong pagkamatinumanon.

Salmo 108:4

Kay ang imong mahigugmaong-kalolot daku man ibabaw sa kalangitan; Ug ang imong kamatuoran nagaabut ngadto sa mga langit.

NAGTAWAG ANG DIOS KANATO SA PAGDUOL KANIYA 13

Pinadayag 22:17

Ang Espiritu ug ang Pangasawonon nagaingon, “Umari ka.” Ug siya nga nagapatalinghug, paingna, “Umari ka.” Ug ang giuhaw paaria; ang may tinguha, paimna sa walay bayad nga tubig nga nagahatag sa kinabuhi.

Juan 7:37

Ug unya sa katapusang adlaw, ang labing dakung adlaw sa fiesta, si Jesus mitindog ug misinggit nga nagingon, “Kon adunay ta-wong giuhaw, umari siya kanako ug uminom.”

Isaias 1:18

Umari kamo karon, ug usahan ta paghusay, nag-ingon si Jehova:

bisan pa ang inyong mga sala mapula, sila pagapution ingon sa nieve; bisan pa sila lubos mapula, sila mahimong sama sa maputing balhibo sa carnero.

Mateo 11:28

“Umari kanako, kamong tanan nga nabudlay ug nabug-atan, ug papahulayon ko kamo.”

Isaias 55:1

Ho, ang tagsatagsa nga ginauhaw, umari kamo sa mga tubig, ug siya nga walay salapi; umari kamo, pumalit, ug kumaon; oo, umari kamo, palit ug vino ug gatas sa walay salapi ug sa walay bili.

14 DILI ANG TANANG TAWO ANAK SA DIOS

Mga Taga-Filipos 2:15

Aron mahimo kamong putli ug dili masalawayon, mga anak sa Dios nga mga walay buling, taliwala sa usa ka kaliwatan nga hiwi ug masupilon, nga sa taliwala nila kamo nagasidlak ingon nga mga kahayag dinhi sa kalibutan.

2 Mga Taga-Corinto 6:17, 18

“Busa panggula kamo gikan kanila, ug magpalain kamo gikan kanila, nagaingon ang Ginoo, ug ayaw na kamo paghikap ug mahugaw; unya pagahinangpon ko kamo, ug ako mahimong inyong amahan, ug kamo mahimong akong mga anak nga lalaki ug mga

anak nga babaye, nagaingon ang Ginoo nga Makagagahum sa Tanaan.”

Juan 1:12

Apan sa tanang midawat kaniya, sa tanang mitoo sa iyang ngalan, kanila naghatag siyag kagahum sa pagkahimong mga anak sa Dios.

1 Juan 3:10

Maila kon kinsa ang mga anak sa Dios ug kinsa ang mga anak sa yawa pinaagi niini: bisan kinsa nga wala maghimog pagkamatarung ug wala maghigugma sa iyang igsoon, kini siya dili iya sa Dios.

UNSAY GISULTI SA DIOS MAHITUNGOD SA MAKAHUBOG NGA ILMNON

15

Isaias 5:11

Alaut niadtong mosayo pagbangon sa kabuntagon, aron sila managhubog sa maisug nga mga ilimnon; alaut niadtong managtukaw sa tibook kagabhion hangtud sila manginit sa vino.

Mga Taga-Galacia 5:19-21

Ug dayag kaayo ang mga buhat sa unod nga mao kini: pakighilawas, kahugaw, kaulag, pagsimbag mga diosdios, panglamat, mga dinumtanay, mga pakigbingkil, pangabubho, kapungot, iyaiyahay, sinupakay, pundokpundok, kasina, huboghubog, hudyaka-bahakhak, ug mga butang nga maingon-ing-

on niini. Pasidan-an ko kamo, sama sa ako nang pagpasidaan kaninyo kaniadto, nga ang mga nagabuhat sa maong mga butang dili magapanunod sa gingharian sa Dios.

Mga Taga-Roma 13:13, 14

Maingon sa maadlaw, magkinabuhi kita nga maligdong, dili sa mga paghudyaka-bahakhak ug sa mga paghuboghubog, dili sa pakighilawas ug kalaw-ayan, dili sa pakig-away ug pagpangabubho. Hinonoa isul-ob ninyo ang Ginong Jesu-Cristo, ug ayaw kamo pagtagana alang sa unod, sa pagtagbaw sa mga pangibog niini.

Marcos 10:17b-21

. . . “Maayong Magtutudlo, unsa bay akong buhaton aron makapanunod ako sa kinabuhing dayon?” Kaniya mitubag si Jesus nga nag-ingon, “Nganong giingnan mo man ako nga maayo? Walay bisan usa nga maayo gawas sa Dios lamang. Nahibalo ikaw sa mga sugo: ‘Ayaw pagbuno, Ayaw pagpanapaw, Ayaw pagpangawat, Ayaw pagsaksig bakak, Ayaw pagpanikas, Tumahod ka sa imong amahan ug inahan.’” Ug siya miingon kaniya, “Magtutudlo, kanang tanan ako nang ginabantayan sukad pa sa akong pagkabatan-on.” Ug si Jesus, sa nagsud-

ong siya kaniya, nahigugma kaniya ug miingon kaniya, “Kulang kag usa ka butang; lumakaw ka, ibaligya ang imong katigayonan ug ang halin ihatag ngadto sa mga kabus, ug makabaton kag bahandi didto sa langit; ug unya umanhi ka ug sumunod ka kakanako.”

Mateo 22:37, 38

Ug si Jesus miingon kaniya, “Higugmaa ang Ginoo nga imong Dios sa tibuok mong kasingkasing, ug sa tibuok mong kalag, ug sa tibuok mong salabutan. Mao kana ang daku ug unang sugo.”

Santiago 1:22

Hinoon tumana ninyo ang pu-
long, ug dili kay magpaminaw ra
kamo niini, nga sa ingon ginalim-
bongan kamo sa inyong kauga-
lingon.

1 Mga Taga-Corinto 6:9, 10

Nasayud ba kamo nga ang mga
dili matarung dili makapanunod sa
gingharian sa Dios? Ayaw kamo
pagpalimbong; walay mga makihi-
lawason, o mga tigsimba ug mga
diosdios, o mga mananapaw, o
mga bayot, o mga kawatan, o mga
dalo, o mga palahubog, o mga tig-
pasipala, o mga tulisan, nga maka-
panunod sa ginghamian sa Dios.

1 Juan 3:7, 8a

Mga anak, kinahanglan walay
magapahisalaag kaninyo. Ang na-
gahimog pagkamatarung, mata-
rung man maingon nga kadto siya
matarung. Ang nagahimog pag-
pakasala, iya sa yawa; kay ang
yawa nagapakasala man sukad
pa sa sinugdan.

Mga Taga-Efeso 5:6

Ayaw kamo patonto ni bisan
kinsa pinaagi sa mga pangataru
ngan nga walay hinungdan, kay
tungod niining mga butanga ang
kapungot sa Dios magaabut diha
sa mga tawong masupilon.

Ezequiel 18:20

Ang kalag nga makasala, kini mamatay: ang anak dili magapas-an sa kasal-anan sa amahan, ni ang amahan magapas-an sa kasal-anan sa anak; ang pagkamatarung sa matarung anha kaniya, ug ang pagkadautan sa dautan anha kaniya.

Mga Proverbio 11:19

Kadtong kanunay sa pagkamatarung makadangat ngadto sa kinabuhi; Ug kadtong nagapangita sa dautan nagahimo niana alang sa iyang kaugalingong kamatayon.

Mga Taga-Roma 5:12

Busa, maingon nga ang sala misulod sa kalibutan pinaagi sa

usa ka tawo ug ang kamatayon misulod pinaagi sa sala, ug nga tungod niini ang kamatayon mi-kuyanap ngadto sa tanang mga tawo sanglit ang tanang mga tawo nakasala man.

Mga Taga-Roma 8:6

Ang panghunahuna alang sa unod mosangpot sa kamatayon, apan ang panghunahuna alang sa Espiritu mosangpot sa kinabuhi ug kalinaw.

Santiago 1:15

Ug ang pagpangibog, sa maka-panamkon na, magapahimugsog sala; ug ang sala, inigkagulang na, manganak ug kamatayon.

1 Mga Taga-Corinto 15:3, 4

Kay gihatag ko kaninyo ingon nga labing hinungdanon ang nadawat ko ra usab, nga si Cristo namatay tungod sa atong mga sala sumala sa kasulatan, nga siya gilubong, nga siya nabanha sa ikatulo ka adlaw sumala sa kasulatan.

Pinadayag 1:18

“Ug ang Buhi. Ako namatay, apan tan-awa, ako karon buhi hangtud sa kahangturan, ug ania kanako ang mga yawi sa Kamatayon ug sa Hades.”

Juan 10:17, 18

“Ako gihigugma sa Amahan sa katarungan nga mao kini: kay

ako magahalad man sa pagpamatay sa akong kinabuhi, sa paghalad niini aron mabawi ko ra usab unya. Walay tawo nga maka-kuha niini gikan kanako, hinonoa ginahalad ko kini sa kinaugalingon kong pagbuot. May kagahum ako sa paghalad niini, ug may kagahum ako sa pagbawi niini. Kining maong sugo nadawat ko gikan sa akong Amahan.”

Lucas 7:14, 15a

Ug siya miduol ug iyang gikuptan ang lungon, ug ang mga nanagyayong niini mihunong. Ug siya miingon, “Dong, ingnon ko ikaw, bangon.” Ug ang namatay milingkod ug misugod sa pagsulti.

Deuteronomio 5:7-21

Dili ka magbaton ug laing mga dios sa atubangan ko.

Dili ka magbuhat alang kanimo ug linilok nga larawan, ni sa bisan unsa nga dagway sa bisan unsa nga butang nga atua sa ibabaw sa langit, kun sa ilalum sa yuta, kun sa tubig sa ilalum sa yuta: Dili mo iyukbo ang imong kaugalingon kanila, ni mag-alagad kanila. . .

Dili mo paggamiton sa pasipala ang ngalan ni Jehova nga imong Dios: kay dili pagaisipon ni Jehova nga walay sala ang magagamit sa iyang ngalan sa pasipala.

Bantayan mo ang adlaw nga igpapahulay aron sa pagbalaan niini, ingon sa gisugo kanimo ni Jehova nga imong Dios. Magabuhat ka sa unom ka adlaw ug buhaton mo ang tanan mo nga buhaton. Apan ang ikapito ka adlaw, adlaw nga igpapahulay alang kang Jehova nga imong Dios. . .

Tahuron mo ang imong amahan ug ang imong inahan, ingon sa gisugo kanimo ni Jehova nga imong Dios. . .

Dili ka magpatay.

Dili ka usab manapaw.

Dili ka usab mangawat.

Dili ka usab magsaksi sa bakak batok sa imong isigkatawo.

Dili ka usab maibug sa asawa sa imong isigkatawo; dili ka usab maibug sa balay sa imong isigkatawo, ni sa iyang yuta, ni sa iyang sulogoon nga lalake, ni sa

iyang sulogoon nga babaye, ni sa iyang vaca, ni sa iyang asno, ni sa bisan unsang butanga nga iya sa imong isigkatawo.

DILI KA MAKATAGO GIKAN SA DIOS

21

Lucas 8:17

“Kay walay butang nahisalipdan nga dili igapadayag, ug walay butang natago nga dili mahiba-loan ug mabutag.”

Salmo 139:8 ug 12

Kong mosaka ako ngadto sa langit, didto atua ikaw: Kong sa Sheol pagabuhaton ko ang akong higdaanan, ania karon, didto atua ikaw. . . Bisan ngani ang kangitngit dili makatago gikan kanimo,

Kondili ang kagabhion mohayag ingon sa kasanag sa adlaw: Kanimmo ang kangitngit ug ang kahayag managsama lamang.

Jeremias 23:24

Aduna bay usa nga makatago sa iyang kaugalingon sa mga suok sa pagkaagi nga ako dili makakita kaniya? nagaingon si Jehova. Dili ba napuno ko ang langit ug yuta? nagaingon si Jehova.

22 WALAY KATAPUSANG SILOT SA MGA DILI-DIOSNON

2 Pedro 3:7

Apan pinaagi sa mao ra usab nga pulong ang mga langit ug ang yuta nga karon nagalungtad gikatagana alang sa kalayo, ginatipigan alang sa adlaw sa panudya ug sa kalaglagaan sa mga tawong dili diosnon.

Salmo 9:17

Ang mga dautan pabalikon ngadto sa Sheol, Lakip ang tanang mga nasud nga nalimot sa Dios.

Mateo 18:8

“Ug kon ang imong kamot o tiil mao ang makaingon kanimo sa imong pagpakasala, putla ug isalibay kini gikan kanimo; kay maayo

pa alang kanimo nga magasulod ka sa kinabuhi bisan pungkol o bakul, kay sa may duha ikaw ka mga kamot o duha ka mga tiil apan igabanlud ikaw ngadto sa kalayo nga walay pagkatapus.”

Mateo 13:41, 42

“Ang Anak sa Tawo magapadala unya sa iyang mga manolunda, ug ilang tapukon ug hakuton pagawas sa iyang gingharian ang tanang hinungdan sa pagpakasala ug ang tanang mga magbubuhat ug kadautan, ug ilang igasalibay kini sila ngadto sa hudno nga magadilaab; didto ang mga tawo managpanghilak ug managkagot sa ilang mga ngipon.”

1 Juan 4:17

Niini gihingpit ang gugma dinhi kanato, aron kita may pagsalig unya sa adlaw sa hukom, sanglit maingon nga mao siya mao man usab kita dinhi sa kalibutan.

2 Mga Taga-Corinto 5:10

Kay kitang tanan kinahanglan magapangatubang sa hukmanan ni Cristo, aron ang matag-usa magadawat sumala sa nabuhat sa iyang lawas, maayo o dautan.

2 Pedro 2:9

Nan, ang Ginoo mahibalo sa pagluwas sa mga tawong diosnon gikan sa mga pagtintal, ug sa pagbantay nga ang mga dili matarung

magapabilin ubos sa silot hangtud sa adlaw sa paghukom.

Mga Hebreohanon 9:27

Ug maingon nga ang tawo ginabut-an nga mamatay sa makausa ra, ug tapus niana mao ang hukom.

Mga Buhat 17:31

“Kay siya nakatudlo na ug adlaw kanus-a, subay sa katarungan, iyang pagahukman ang kalibutan pinaagi sa usa ka tawo nga iyang gitudlo alang niini, ug kini iyang gipanghimatud-an ngadto sa tanang mga tawo pinaagi sa pagbanhaw kaniya gikan sa mga patay.”

1 Pedro 5:5b

. . . Ang Dios magabatok sa mga mapahitas-on, apan sa mga mapaubsanon siya magahatag ug grasya.”

2 Mga Taga-Corinto 8:9

Kay kamo nasayud na sa grasya sa atong Ginoong Jesu-Cristo, nga bisan tuod siya dato, siya nahimong kabus alang kaninyo aron nga pinaagi sa iyang kakabus kamo mahimong dato.

Mga Taga-Roma 5:15

Apan ang gasa nga walay bayad lahi ra kaayo sa kalapasan. Kay kon daghan ang nangamatay tungod sa paglapas nga nahimo sa

usa ka tawo, ngadto sa daghan gikapadagaya sa labi pa gayud ang grasya sa Dios ug ang gasa nga walay bayad diha sa grasya niadtong usa ka tawo nga si Jesu-Cristo.

Mga Taga-Roma 9:16

Busa magaagad diay kini dili sa kabubut-on sa tawo o sa iyang paningkamot, kondili sa kalooy sa Dios.

Mga Buhat 4:33

Ug uban sa dakung gahum, ang mga apostoles nanagpamatuod sa pagkabanhaw sa Ginoong Jesus, ug daku ang grasya nga diha kanilang tanan.

Mga Buhat 3:19

“Busa, paghinulsol kamo, ug pamalik na kamo kaniya, aron mapala ang inyong mga sala, aron ang mga panahon sa kahayahay magaabut gikan sa atubangan sa Ginoo.”

Mga Buhat 17:30

“Ang Dios wala lamang manumbaling sa maong mga panahon sa kaburong, apan karon siya nagasugo sa tanang mga tawo bisan diin sa paghinulsol.”

Lucas 13:3

“Ingnon ko kamo, Dili; hino-noa, gawas kon maghinulsol ka-

mo, kamong tanan mangamatay usab sa ingon.”

Mga Buhat 2:38

Ug si Pedro mitubag kanila, “Paghinulsol kamo, ug pabautismo kamo ang matag-usa kaninyo sa ngalan ni Jesu-Cristo tungod sa kapasayloan sa inyong mga sala; ug madawat ninyo ang gasa nga Espiritu Santo.”

2 Mga Taga-Corinto 7:10

Kay ang diosnon nga kasubo mosangpot sa paghinulsol nga magagak ngadto sa kaluwasan ug dili magahambin sa pagbasol, apan ang kasubo nga kalibutanon mosangpot sa kamatayon.

Pinadayag 3:20

“Tan-awa, nagatingdog ako sa pultahan ug nagatuktok; kon may magapatalinghug sa akong tingog ug moabli sa pultahan, kaniya mosulod ako ug makigsalo ako sa pagkaon uban kaniya, ug siya uban kanako.’”

Marcos 2:5

Ug sa pagkakita ni Jesus sa ilang pagsalig, siya miingon sa paralitico, “Anak, ang imong mga sala gipasaylo na.”

Ezequiel 18:21

Apan kong ang dautan motalikod gikan sa tanan niyang mga sala nga iyang nahimo, ug maga-

bantay sa akong tanan nga kaba-laoran, ug magabuhat nianang nahasubay sa balaod ug matarung, siya sa pagkamatuod mabuhi, siya dili mamatay.

Isaias 55:7

Pabiyai sa dautan ang iyang dalan, ug sa tawo nga dili matarung ang iyang mga hunahuna; ug pabalika siya kang Jehova, ug siya malooy kaniya; ug sa atong Dios, kay siya mopasaylo sa madagayaon gayud.

Mateo 6:14

“Kay kon mopasaylo kamo sa mga tawo sa ilang mga paglapas, pasayloon usab kamo sa inyong langitnong Amahan.”

ANG PAGHIMULAG SA KAHILAYAN SA KALIBUTAN 27

Tito 2:11, 12

Kay alang sa kaluwasan sa tanang mga tawo ang grasya sa Dios gikapadayag, nga nagatudlo kanato sa pagbiya sa pagkadili diosnon ug sa mga pangibog nga kalibutanon, ug sa pagkinabuhi nga mapugnganon sa kaugalingon, matarung, ug diosnon dinhi niining kalibutana karon.

Isaias 1:16

Panghunaw kamo, panglinis kamo; ibutang sa halayo ang inyong dautang mga buhat gikan sa atubangan sa akong mga mata; hunong na sa pagbuhat sa dautan.

Mga Taga-Efeso 5:11

Ug ayaw kamo pag-ambit sa mga dili mabungahong buhat sa kangitngit, hinonoa kinahanglan ibutyag ninyo kini.

1 Juan 2:15, 16

Ayaw ninyog higugmaa ang kalibutan, ni ang mga butang diha sa kalibutan. Kon may nagahigugma sa kalibutan, ang gugma alang sa Amahan wala diha kaniya. Kay ang tanan nga anaa sa kalibutan, ang pangibog sa unod ug ang pangibog sa mga mata ug ang pagpagarbo sa kinabuhi, dili gikan sa Amahan kondili sa kalibutan.

1 Pedro 1:23

Kamo gikaanak pag-usab, dili sa binhi nga madunot ra, kondili sa binhi nga walay pagkadunot pinaagi sa buhi ug nagapadayong pulong sa Dios.

1 Juan 2:29

Kon ugaling inyo mang nasayran nga siya matarung, nan nasayud diay usab kamo nga ang tanang nagabuhat ug matarung gipanganak gikan kaniya.

Juan 3:3

Ug si Jesus mitubag kaniya, "Sa pagkatinuod, sa pagkatinuod, magaingon ako kanimo, gawas kon ang tawo igaanak pag-usab, dili siya makakita sa gingharian sa Dios."

Ezequiel 36:26a

Hatagan ko usab kamo sa usa ka bag-o nga kasingkasing, ug ang usa ka bag-ong espiritu igabutang ko sa sulod ninyo. . .

1 Juan 5:18

Kita sayud nga ang gipanganak gikan sa Dios dili magpakasala, apan ang Anak nga gipanganak gikan sa Dios nagabantay kaniya, ug ang dautan dili magahilabut kaniya.

2 Mga Taga-Corinto 5:17

Busa kon ang tawo anaa kang Cristo, siya bag-o nang binuhat; ang daang mga butang nagpangagi na, tan-awa, ang bag-ong mga butang nahiabut na.

PATAY SA SALA — NABANHAW DIHA KANG KRISTO 29

Mga Taga-Colosas 3:1

Kon ugaling gibanhaw man kamo uban kang Cristo, nan, pangitaa ninyo ang mga butang nga anaa sa itaas diin anaa si Cristo nagalingkod sa too sa Dios.

Mga Taga-Efeso 2:1 ug 6

Ug kamo iyang gibúhi sa mga patay pa kamo tungod sa mga kalapasan ug mga kasal-anan. . . ug mibanhaw kanato uban kaniya, ug nagpalingkod kanato uban kaniya sa mga langitnong dapit pinaagi kang Cristo Jesus.

1 Pedro 2:24

Siya gayud mao ang midala sa atong mga sala diha sa iyang lawas ngadto sa kahoy, aron kita

mamatay ngadto sa sala ug mabuhi ngadto sa pagkamatarung. Pinaagi sa iyang mga samad kamo nangaayo.

Mga Taga-Galacia 5:24

Ug ang mga iya ni Cristo Jesus nanaglansang sa ilang unod diha sa krus dala ang mga pangibog ug mga tinguha niini.

Mga Taga-Roma 6:2 ug 11

Kita nga namatay na ngadto sa sala, unsaon man nato sa pagpakabuhi pa diha niana? . . . Busa kamo usab kinahanglan managisip sa inyong kaugalingon nga mga patay na ngadto sa sala apan diha kang Cristo Jesus mga buhi kamo ngadto sa Dios.

Juan 17:3

“Ug ang kinabuhing dayon mao kini, ang ilang pagpakaila kani-mo nga mao ang bugtong tinuod nga Dios, ug kang Jesu-Cristo nga imong pinadala.”

Mga Taga-Roma 6:23

Kay ang suhol gikan sa sala mao ang kamatayon, apan ang walay bayad nga gasa gikan sa Dios mao ang kinabuhing dayon diha kang Cristo Jesus nga atong Ginoo.

Juan 3:14, 15 ug 36

“Ug maingon nga ang halas giisa ni Moises didto sa kaming-awan, maingon man usab kinahanglan igaisa ang Anak sa Tawo,

aron ang tanan nga mosalig kaniya makabaton sa kinabuhing dayon.” . . . Ang mosalig sa Anak may kinabuhi nga dayon; apan ang dili mosugot sa Anak dili makatilawg kinabuhi, hinonoa ang kapungot sa Dios magapabilin diha kaniya.

Juan 5:24

“Sa pagkatinuod, sa pagkatinuod, magaingon ako kaninyo, nga ang magapatalinghug sa akong pulong ug magatoo kaniya nga nagpadala kanako, may kinabuhi nga dayon; siya dili pagahukman, hinonoa nabalhin na siya gikan sa kamatayon ngadto sa kinabuhi.”

Mga Taga-Galacia 4:6

Ug tungod kay kamo mga anak man, ang Dios mipadala sa Espiritu sa iyang Anak nganhi sa atong mga kasingkasing, nga nagatuwaw, “Abba! Amahan!”

Juan 14:21

“Ang nagabaton sa akong mga sugo ug nagatuman niini, kini siya mao ang nahigugma kanako; ug ang nahigugma kanako pagahigugmaon sa akong Amahan, ug ako mahigugma kaniya ug magapadayag sa akong kaugalingon ngadto kaniya.”

1 Juan 3:18, 19

Mga anak, kinahanglan maghigugma kita dili lamang pinaagi

sa pulong o sa sulti, kondili pinaagi sa buhat ug sa tinuoray gayud. Pinaagi niini kita mahibalo nga kita iya sa kamatuoran, ug makapasalig kita sa atong mga kasingkasing diha sa iyang atubangan.

1 Juan 4:13

Ug mahibaloan nato nga kita nagapabilin diha kaniya ug siya dinhi kanato pinaagi niini: tungod kay kita iya mang gihatagan sa iyang kaugalingong Espiritu.

Mga Taga-Roma 8:16

Ang Espiritu gayud mao ang magapanghimatuod uban sa atong espiritu nga kita mga anak sa Dios.

32 ANG KRISTONG ANA-A SA SULOD SA ATONG KINABUHI NAKAHATAG UG KALIPAY

Juan 15:11

“Kining mga butanga gisulti ko kaninyo, aron ang akong kalipay magapabilin diha kaninyo, ug ang inyong kalipay mamahingpit.”

Juan 17:13

“Apan karon moanha na ako kanimo, ug kining mga butanga gisulti ko dinhi sa kalibutan aron makabaton sila sa akong kalipay nga matuman diha kanila.”

Mga Taga-Galacia 2:20

Gilansang ako sa krus uban kang Cristo; dili na ako ang nabuhi, kondili si Cristo ang nabuhi sa sulod nako; ug ang kinabuhi nga karon akong ginakinabuhi

sa lawas akong ginakinabuhi pinaagi sa akong pagtoo sa Anak sa Dios, nga nahigugma kanako ug mitugyan sa iyang kaugalingon alang kanako.

Salmo 16:11

Igapakita mo kanako ang dalan sa kinabuhi: Sa imong presencia anaa ang kahupnganan sa kalipay; Sa imong toong kamot adunay mga kalipayan nga sa walay katapusan.

Mga Taga-Roma 14:17

Kay ang gingharian sa Dios dili kalan-on o ilimnon, kondili pagkamatarung ug pakigdait ug kalipay diha sa Espiritu Santo.

Mga Taga-Roma 2:13

Kay dili ang mga nagapataling-hug sa kasugoan maoy matarung sa atubangan sa Dios, kondili ang mga nagatuman sa kasugoan mao ang pakamatarungon.

2 Mga Taga-Tesalonica 1:7-9

Ug nga uban kanamo, kamo nga ginasakit pagahatagan ra unya niyag pahulay sa diha nga ang Ginoong Jesus, sa kalayo nga magadilaab, igapadayag na gikan sa langit kinuyogan sa iyang gamhanang mga manolunda. Siya magapahamtang ug panimalus diha kanila nga wala makaila sa Dios ug kanila nga wala magmasinug-

tanon sa Maayong Balita mahitungod sa atong Ginoong Jesus. Mahiaguman ra nila ang silot sa pagkalaglag nga walay katapusan ug ang pagkahininginlan gikan sa atubangan sa Ginoo ug gikan sa himaya sa iyang gahum.

Mga Taga-Roma 6:16

Wala ba kamo masayud nga kon itugyan ninyo ang inyong kaugalingon ingon nga mga masinugtanong ulipon ngadto kang bisan kinsa, kamo mga ulipon niya nga inyong ginasugot, — mga ulipon nga iya sa sala nga naghatud ngadto sa kamatayon, o iya sa pagkamasinugtanon nga naghatud ngadto sa pagkamarung?

34 PAGESUGID KANG KRISTO GIKINAHANGLAN

Mga Taga-Roma 10:9, 10

Kay kon pinaagi sa imong baba magasugid ikaw nga si Jesus mao ang Ginoo, ug magatoo sa sulod sa imong kasingkasing nga siya gibanhaw sa Dios gikan sa mga patay, nan, maluwas ikaw. Kay ang tawo magatoo diha sa iyang kasingkasing aron mamatarung siya; ug siya magasugid pinaagi sa iyang baba aron maluwas siya.

Lucas 9:26

“Kay bisan kinsa nga magaka-ulaw tungod kanako ug sa akong mga pulong, siya igakaulaw man sa Anak sa Tawo inig-abut niya diha sa iyang himaya ug sa hima-

ya sa Amahan ug sa mga balaang manolunda.”

Mga Taga-Filipos 2:11

Ug ang tanang dila magasugid nga Ginoo si Jesu-Cristo, alang sa pagdalayeg sa Dios nga Amahan.

Mateo 10:32, 33

“Busa, bisan kinsa kadtong moila kanako sa atubangan sa mga tawo, ihon ko usab siya sa atubangan sa akong Amahan nga anaa sa langit; apan bisan kinsa kadtong dili moila kanako sa atubangan sa mga tawo, dili ko usab siya ilhon sa atubangan sa akong Amahan nga anaa sa langit.”

SI SATANAS — ANG ATONG ARKO NGA KA-AWAY 35

Mga Taga-Efeso 6:11

Isul-ob ninyo ang tibuok hinagiban sa Dios, aron makabarug kamo batok sa mga malipatlipatong kaugdahan sa yawa.

Mateo 4:1 ug 10, 11

Unya si Jesus gihatud sa Espiritu ngadto sa mga awaaw aron tintalon sa yawa. . . Kaniya mitubag si Jesus nga nagingon, “Pahawa ka, Satanas! kay nahisulat kini nga nagaingon, ‘Maoy simbaha ang Ginoo nga imong Dios, ug siya lamang ang alagara.’” Unya ang yawa mipahawa kaniya, ug tan-awa, dihay mga manolunda nga miabut ug mialagad kaniya.

1 Pedro 5:8

Magmalinawon kamo sa hunahuna, managtukaw kamo. Ang inyong kaaway nga mao ang yawa nagalibotlibut sama sa leon nga nagangulob nga nangitag iyang matukob.

Mga Buhat 26:18

“‘Aron sa pagpabuka sa ilang mga mata, aron sila managpamalikisan sa kangitngit ngadto sa kahayag ug gikan sa kagamhanan ni Satanas ngadto sa Dios, aron mapasaylo ang ilang mga sala ug managdawat sila sa ilang bahin diha sa mga nangahimong balaan pinaagi sa pagsalig kanako.’”

1 Juan 3:8

Ang nagahimog pagpakasala, iya sa yawa; kay ang yawa naga-pakasala man sukad pa sa sinugd-an. Ang hinungdan nganong gi-padayag ang Anak sa Dios mao kini: aron sa paglaglag sa mga binuhatan sa yawa.

Mga Taga-Roma 8:35 ug 37

Kinsa ba ang makapahimulag kanato gikan sa gugma ni Cristo? Ang pag-antus ba, o ang kasa-kitan, o ang paglutos, o ang gutom, o ang kahubo, o ang kata-lagman, o ang espada ba? . . . Dili, hinonaa niining tanang mga butanga labaw pa kita ka mga

mananaug pinaagi kaniya nga nahigugma kanato.

Santiago 4:7, 8a

Busa magpasakop kamo nga masinugtanon sa Dios; apan sukli ninyo ang yawa, ug kini siya mokaratil pagdalagan gikan kaninyo. Dumuol kamo sa Dios ug siya moduol kaninyo.

2 Mga Taga-Tesalonica 2:8

Ug unya ugaling ang masupilon igapadayag na, ug pagapatyon kini sa Ginoong Jesus pinaagi sa ginhawa sa iyang baba ug pagalag-lagon kini pinaagi sa pagpadayag sa iyang pag-abut.

GUGMA MAOY SULAY SA ATONG PAGKA-DISCIPOLO 37

1 Juan 4:20

Kon adunay magaingon, “Ako nagahigugma sa Dios,” apan nagadumot sa iyang igsoon, nan, kini siya bakakon; kay siya nga wala maghigugma sa iyang igsoon nga iya rang makita, dili gayud makahimo sa paghigugma sa Dios nga wala niya makita.

Mga Taga-Galacia 5:22, 23a

Apan ang bunga sa Espiritu mao ang gugma, kalipay, kalinaw, pailub, pagkamapuanguon, pagkamaayo, pagkamatinumanon, kaghop, pagpugong sa kaugalingon.

Juan 13:35

“Ang tanang tawo makaila nga kamo mga tinun-an ko pinaagi

niini, kon kamo maghigugmaay ang usa sa usa.”

Juan 21:16

Siya miingon kaniya sa ikaduha, “Simon, anak ni Juan, gihigugma mo ba ako?” Siya mitubag kaniya, “Oo, Ginoo, nasayud ka nga gihigugma ko ikaw.” Siya miingon kaniya, “Tagda ang akong mga karnero.”

1 Juan 3:14

Kita nasayud nga kita nakalabang na gikan sa kamatayon ngadto sa kinabuhi, tungod kay kita nagahigugma man sa mga igsoon. Siya nga wala magahigugma nagapabilin pa gihapon sa kamatayon.

Mga Taga-Roma 4:25

Nga gitugyan ngadto sa kamatayon tungod sa atong kalapasan ug gibanhaw alang sa pagpamatarung kanato.

Juan 20:26-28

Walo ka adlaw tapus niini, ang iyang mga tinun-an didto na usab sa sulod sa balay, ug si Tomas uban kanila. Ang mga pultahan tinakpan, apan si Jesus mitungha ug mitindog sa ilang taliwala, ug miingon, “Ang kalinaw magauban kaninyo.” Ug siya miingon kang Tomas, “Ihikap dinhi ang imong tudlo, ug tan-awa ang akong mga kamot; ambi ang imong kamot ug ipasulod kini sa akong kilid. Ayaw

na nianang pagkadili matinoohon, hinonoa magmatinoohon ka.” Ug si Tomas miingon kaniya, “Ginoo ko ug Dios ko!”

Mga Buhat 10:39-41

“Ug kami maoy mga saksi sa tanang gipamuhat niya sulod sa kayutaan sa mga Judio ug sa Jerusalem. Ug siya ilang gipatay pinaagi sa pagbitay kaniya diha sa kahoy. Apan sa Dios gibanhaw siya sa ikatulo ka adlaw ug gitugot nga siya igapakita, dili ngadto sa tanang tawo kondili nganhi kanamo nga gipili sa Dios ingon nga mga saksi, nga nangaon ug nangi-nom uban kaniya human siya mabanhaw gikan sa mga patay.”

ANG PAGKABANHAW MAOY ATONG MAHIMAYAONG PAGLAUM

39

2 Mga Taga-Corinto 4:14

Ug sa nasayran namo nga ang nagbanhaw sa Ginoong Jesus magabanhaw usab kanamo uban kang Jesus ug magadala kanamo uban kaninyo ngadto sa iyang atubangan.

Juan 5:25 ug 28, 29

“Sa pagkatinuod, sa pagkatinuod, magaingon ako kaninyo, nga ang takna nagasingabut, ug karon mao na, nga ang mga patay managpakabati sa tingog sa Anak sa Dios, ug kadtong magapatalinghug mabuhi. . . Ayaw kamo ka-hibulong niini, kay ang takna nagasingabut na nga ang tanan nga

anaa sa mga lubong managpakabati sa iyang tingog, ug ang mga nanagbuhat ug maayo managpanggula nga binanhaw ngadto sa kinabuhi, ug ang mga nanagbuhat ug mangil-ad managpanggula nga binanhaw ngadto sa pagkahinukman sa silot.”

Mateo 16:21

Sukad niadtong panahona gisugdan ni Jesus ang pagpahayag ngadto sa iyang mga tinun-an nga kinahanglan moadto siya sa Jerusalem. . . ug pagapatyon siya, ug sa ikatulo ka adlaw pagabanhawon siya.

40 PAGKABALAANON NGADTO SA GINOO

Mga Hebreohanon 12:14

Panglimbasugi ang pagpakig-dinaitay uban sa tanang tawo, ug ang pagkabinalaan nga kon wala kini walay bisan kinsa nga maka-kita sa Ginoo.

1 Pedro 1:2 ug 15

Nga gipili sumala sa nahiba-loan nang daan sa Dios nga Amahan ug gibalaan sa Espiritu aron mahimong masinugtanon kang Jesu-Cristo ug masinabligan sa iyang dugo: Ang grasya ug kalinaw padagayaon unta kaninyo. . . apan maingon nga balaan man siya nga nagtawag kaninyo, kinahanglan kamo usab magmabalaanon sa tanan ninyong paggawi.

Lucas 1:74, 75

“Aron sa pagtugot kanato nga kita, ingon nga linuwas gikan sa kamot sa atong mga kaaway, magaalagad unta kaniya sa walay pagkahadlok, diha sa kabalaanon ug pagkamatarung, sa iyang atubangan, sa tanang mga adlaw sa atong kinabuhi.”

2 Timoteo 2:21

Kon ang usa ka tawo magaputli sa iyang kaugalingon gikan sa butang nga talamayon, nan, siya mahimong sulodlan nga alang sa dungganan nga kagamitan, binalaan ug mapuslan sa agalon sa panimalay, andam alang sa tanang maayong bulohaton.

Mateo 3:11

“Ako nagabautismo kaninyo sa tubig tungod sa paghinulsol; apan siya nga nagapaulahi kanako labi pang gamhanan kay kanako, nga bisan gani sa iyang mga sapin dili ako takus sa pagbitbit; ang iyang igabautismo kaninyo mao ang Espiritu Santo ug kalayo.”

Isaias 35:8

Ug didto may usa ka dalan, ug usa ka alagianan, ug kini pagatawgon: Ang alagianan sa pagkabalaaan; ang mahugaw dili moagi sa ibabaw niini; apan kini maila sa mga linuwas: nga maglalakaw nga mga tawo, oo, ang mga hungog dili mangasayup sa sulod niini.

Mga Taga-Efeso 1:4

Diha kaniya, sa wala pa matukod ang kalibutan, siya nagpili kanato aron kita mabalaan ug dili masalawayon diha sa atubangan sa Dios.

Mga Hebreohanon 13:12

Sa ingon niini si Jesus usab nagantus didto sa gawas sa ganghaan aron sa pagbalaan sa tawo pinaagi sa iyang kaugalingong dugo.

1 Juan 1:9

Kon isugid ta ang atong mga sala, siya kasaligan ug makatarunganon nga tungod niana mopasaylo siya sa atong mga sala ug magahinlo kanato gikan sa tanang pagkadili makatarunganon.

Mga Buhat 1:8a

“Apan kamo magadawat hinoon ug gahum sa diha nga kakunsaran na kamo sa Espiritu Santo; ug kamo mao unya ang akong mga saksi. . .

Mga Taga-Roma 8:9

Apan kamo wala diha sa unod, hinonoa anaa kamo sa Espiritu kon tinuod man nga ang Espiritu sa Dios nagapuyo diha sa sulod ninyo. Ang wala magbaton sa Espiritu ni Cristo dili iya ni Cristo.

Mga Buhat 4:31

Ug sa nakaampo na sila, nauyog ang dapit diin nanagkatigum sila; ug silang tanan napuno sa

Espiritu Santo ug nanagsulti sa pulong sa Dios sa walay kahadlok.

Mga Buhat 11:24

Kay si Bernabe usa man ka tawong maayo, puno sa Espiritu Santo ug sa pagtoo. Ug nahidugang ngadto sa Ginoo ang usa ka dakung panon sa mga tawo.

Mga Buhat 13:52

Ug ang mga tinun-an napuno sa kalipay ug sa Espiritu Santo.

Ezequiel 36:27

Ug igabutang ko ang akong Espiritu sa sulod ninyo, ug palakton ko kamo sa akong kabalaoran, ug kamo magabantay sa akong mga tulomanon, ug magatuman kanila.

MGA KAHIBULONGANG SAAD NGADTO SA MGA KRISTIANO

43

Pinadayag 21:4

“Ug iyang pagapahiran ang tanang luha gikan sa ilang mga mata, ug ang kamatayon wala na; ug wala na usab unyay pagminatay, ni paghilak, ni kasakit, kay ang unang mga butang nangagi na.”

1 Pedro 4:12, 13

Mga hinigugma, ayaw kamo paghikurat sa magasilaob nga kalislanan nga magaabut sa pagsulay kaninyo, nga kaha pagaingnon ninyo nga usa ka talagsaong butang ang nahitabo kaninyo. Magkalipay hinoon kamo sumala sa

inyong pagpakaambit sa mga kasakit ni Cristo, aron kamo magakalipay usab ug magamasadyaon inigpadayag na unya sa iyang himaya.

Isaias 66:2

Kay kining tanan nga mga butanga gibuhat sa akong kamot, ug tungod niini kining tanan nga mga butanga nangamao, nag-ingon si Jehova: apan niining tawohana motan-aw ako, bisan pa kaniya nga kabus ug adunay espiritu nga mahinulsolon, ug nga nagapangurog tungod sa akong pulong.

Mga Hebreohanon 2:18

Kay maingon nga siya gayud nakaantus man sa diha nga gitintal siya, nan, makahimo siya sa pagtabang kanila nga mga ginatintal.

Salmo 34:19

Daghan ang mga kagul-anan sa matarung; Apan si Jehova magaluwas kaniya gikan kanilang tanan.

Mga Taga-Roma 8:28

Kita nasayud nga diha sa matag-usa ka butang ang Dios nagabuhat ug maayo uban kanila nga mga nahigugma kaniya ug mga tinawag sumala sa iyang katuyoan.

Isaias 43:2

Sa diha nga ikaw magaubog sa mga tubig, ako magauban kanimo; ug sa mga kasapaan, kini dili magalapaw kanimo: sa diha nga ikaw magalakaw latas sa kalayo, ikaw dili masunog, ni ang kalayo mosilaub diha kanimo.

1 Mga Taga-Corinto 10:13

Kaninyo walay nakaabut nga bisan unsang pagpanulay nga dili maantus sa tawo. Ang Dios kasaligan, ug dili niya itugot kamo nga pagapanulayon sa labaw sa inyong kaarangan, apan uban sa pagpanulay siya magatagana usab ug lutsanan sa paglikay, aron kamo makahimo sa pag-antus niini.

Pinadayag 3:5

“Sa ingon niini ang magamadaugon pagasul-oban ug mga bisti nga maputi, ug ang iyang ngalan dili ko pagapapason gikan sa basahon sa kinabuhi, hinonoa igatugan ko ang iyang ngalan sa atubangan sa akong Amahan ug sa atubangan sa iyang mga manolunda.’”

Pinadayag 3:12

“Siya nga magamadaugon, akong pagahimoon nga haligi diha sa templo sa akong Dios; ug dili na siya magagula niini, ug igasulat ko diha kaniya ang ngalan sa akong Dios, ug ang ngalan sa siyudad sa akong Dios, ang bag-ong Jerusalem nga manaug gikan sa

langit gikan sa akong Dios, ug ang akong kaugalingong bag-ong ngalan.’”

Pinadayag 3:21

“Ang magamadaugon pagatugotan ko sa paglingkod sa akong trono uban kanako, maingon nga ako usab nagmadaugon ug milingkod uban sa akong Amahan diha sa iyang trono.’”

Pinadayag 2:7

“Ang adunay igdulogog, kinahanglan magapatalinghug sa sulti sa Espiritu ngadto sa mga iglesia. Ang magamadaugon pagatugotan ko sa pagkaon sa bunga sa kahoy nga nagahatag ug kinabuhi nga anaa sa paraiso sa Dios.’”

46 **ANG DIOS NAGSULTI KANATO MAHITUNGOD SA DIBURSYO**

Mateo 5:32

“Apan magaingon ako kaninyo nga bisan kinsa nga mobulag sa iyang asawa, gawas kon ang hinungdan mao ang pakighilawas, nagahimo kaniya nga mananapaw; ug ang mangasawa sa usa ka babayeng binulagan, nakapana-paw.”

Mga Taga-Roma 7:2, 3

Tungod niini, ang babayeng minyo gipasakop sa kasugoan ngadto sa iyang bana samtang magapabiling buhi ang bana. Apan kon mamatay ang iyang bana, siya mahigawas na gikan sa

kasugoan mahitungod sa bana. Sumala niini, siya pagaisipon nga mananapaw kon makigpuyo siyag laing lalaki samtang buhi pa ang iyang bana. Apan kon mamatay ang iyang bana, mahigawas na siya sa maong kasugoan, ug kon mamana siyag lain dili siya mananapaw.

1 Mga Taga-Corinto 7:11

(Apan kon siya mobulag man gayud, kinahanglan magapabilin siya nga maginusara; kon dili man, kinahanglan magpakig-uli siya sa iyang bana) — ug nga ang bana dili gayud magbulag sa iyang asawa.

ANG IKADUHANG PAGBALIK NI KRISTO

47

Mateo 24:27

“Kay maingon nga ang kilat magakilab gikan sa sidlakan ug makita hangtud sa kasadpan, maingon man usab unya niini ang pag-abut sa Anak sa Tawo.”

Pinadayag 3:11

“‘Moanha na ako sa dili madugay; kupti pag-ayo ang imong nabatonan, aron walay makaagaw sa imong purongpurong.’”

Marcos 8:38

“Kay bisan kinsa nga magakaulaw tungod kanako ug sa akong mga pulong dinhi niining mananapaw ug makasasala nga kali-

watan, igakaulaw usab siya sa Anak sa Tawo inig-abut niya diha sa himaya sa iyang Amahan kauban sa mga manolunda nga balaan.”

Santiago 5:8

Kamo usab kinahanglan magpailub. Lig-ona ang inyong mga kasingkasing, kay haduol na ang pag-anhi sa Ginoo.

Juan 14:3

“Ug sa mahiadto na ako ug makaandam na akog luna alang kaninyo, moanhi ako pag-usab ug pagadawaton ko kamo nganhi uban kanako, aron nga diin gani ako atua usab kamo.”

48 **ANG IKADUHANG PAGBALIK NI KRISTO**

Lucas 12:40

“Kamo usab kinahanglan mangandam, kay ang Anak sa Tawo moabut sa takna nga wala ninyo hunahunaa.”

1 Juan 3:2

Mga hinigugma, kita karon mga anak sa Dios; kon maunsa unya kita, kini wala pa ipakita, apan kita nasayud nga sa igapadayag na siya, kita mahisama kaniya, kay kita magasud-ong man unya kaniya sa iyang pagkamao.

Mga Buhat 1:11

Ug miingon kanila, “Mga tawong Galileanhon, nganong nagatindog man kamo dinhi ug naga-

tutok sa langit? Kining maong Jesus nga gikuha gikan kaninyo ngadto sa langit, mobalik ra unya sa paagi nga sama sa inyong nakita sa iyang pagsaka sa langit.”

Pinadayag 16:15

“Tan-awa, moanhi ako ingon sa kawatan! Bulahan ang magatukaw, nga magabantay sa iyang mga bisti aron dili siya magalakaw nga hubo ug magadayag ang iyang pagkamakauulaw!”

Lucas 21:27

“Ug unya ilang makita ang Anak sa Tawo nga magaabut nga sinapwang sa panganud inubanan sa kagahum ug dakung himaya.”

ANG PULONG SA DIOS

Salmo 119:105

Ang imong pulong maoy lamparahan sa akong mga tiil, Ug kahayag sa akong alagianan.

Mateo 22:29

Apan kanila mitubag si Jesus nga nag-ingon, “Nangasayop kamo kay wala kamo makasabut sa kasulatan o sa gahum sa Dios.”

Lucas 21:33

“Ang langit ug ang yuta mangahanaw, apan ang akong mga pulong dili gayud mahanaw.”

2 Timoteo 3:16

Ang tibuok nga Kasulatan gituga sa Dios ug may kapuslanan alang sa pagpanudlo, alang sa

pagpamadlong, alang sa pagpanul-id ug alang sa pagmatoto sa pagkamatarung.

2 Pedro 1:21

Tungod kay wala may profesiya nga miabut pinaagi sa kabuboton sa tawo, hinonoa minandoan sa Espiritu Santo nanagpanulti ang mga balaang tawo sa Dios.

Salmo 119:89

Sa walay katapusan Oh Jehova, ang imong pulong nahamutang sa langit.

Salmo 119:11

Sa akong kasingkasing ginatipigan ko ang imong pulong, Aron dili ako makasala batok kanimo.

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

World Missionary Press, Inc.
P.O. Box 120
New Paris, Indiana 46553-0120 USA